



Broj: 02-04-1-143/23
Maglaj, 31.01.2023. godine

NACRT

Na osnovu člana 13. stav (2) alineja 12. Zakona o principima lokalne samouprave u Federaciji BiH ("Službene novine Federacije BiH", br. 49/06 i 51/09) i člana 18. Statuta Općine Maglaj – prečišćen tekst ("Službene novine Općine Maglaj", br. 8/07, 3/08 i 6/08), a u vezi sa Zaključkom Općinskog vijeća Maglaj, broj: 02-04-1-1050-5/22 od 16.05.2022. godine, Općinsko vijeće Maglaj, na 23. redovnoj sjednici, održanoj 31.01.2023. godine, donosi

ODLUKU O JAVNIM PRIZNANJIMA OPĆINE MAGLAJ

I OSNOVNE ODREDBE

Član 1.

Ovom Odlukom se ustanovljavaju javna priznanja općine Maglaj (u daljem tekstu: javna priznanja), utvrđuju kriteriji za njihovu dodjelu, sadržaj i izgled javnih priznanja te postupak za njihovu dodjelu.

Član 2.

Javna priznanja se mogu dodjeljivati građanima općine Maglaj i drugim licima koja rade na području općine Maglaj, udruženjima, ustanovama, privrednim društvima i drugim pravnim licima za uspjehe u radu i djelovanju, kojima se značajno doprinosi razvoju općine Maglaj, kao cjeline ili pojedinih njenih dijelova, afirmaciji njenih interesa, kao i radi odavanja počasti i zahvalnosti.

Javna priznanja mogu se dodjeljivati i državljanima drugih zemalja, prijateljskim gradovima, međunarodnim organizacijama i organizacijama drugih država ili njihovim tijelima.

Javna priznanja mogu se dodjeljivati i građanima, drugim licima i institucijama koji rade van područja općine Maglaj, udruženjima, privrednim društvima i drugim privrednim licima koji svojim djelovanjem i radom značajno doprinose razvoju općine Maglaj, afirmaciji njenih interesa, kao i radi odavanja počasti i zahvalnosti.

Član 3.

Javna priznanja su:

1. Priznanje Grb Maglaja
2. Priznanje Počasni građanin Maglaja
3. Priznanje Maglajska plaketa
4. Priznanje Maglajska lenta
5. Priznanje Zahvalnica

Član 4.

Grb Maglaja je najviše priznanje.

Grb Maglaja se dodjeljuje građanima općine Maglaj, grupi građana općine Maglaj i drugim licima koja rade na području općine Maglaj, privrednim društvima, ustanovama, vjerskim zajednicama, udruženjima građana i drugim pravnim licima za njihov doprinos i postignute rezultate u teorijskom i praktičnom radu u oblasti nauke, privrede, prosvjete, kulture, umjetnosti, sporta, zdravstva, socijalne zaštite, unapređenje i afirmacija tolerancije, kulture dijaloga i drugih oblasti života u Maglaju, u odbrani Maglaja i Bosne i Hercegovine, zaštiti i afirmaciji ljudskih prava i sloboda garantovanih međunarodnim konvencijama, Ustavom i zakonima, kao i za spašavanje ljudi i imovine, unapređenje uslova života u Maglaju, unapređenje demokratije, suživota i afirmaciji ugleda Maglaja u Bosni i Hercegovini i inostranstvu.

Član 5.

Grb Maglaja dodjeljuje se u principu jednom u dvije (2) godine.

U toku dvije kalendarske godine mogu se dodijeliti najviše dva Grba Maglaja, od čega najviše jedan Grb Maglaja fizičkom licu i najviše jedan Grb Maglaja pravnom licu.

Istom fizičkom licu ili pravnom subjektu, Grb Maglaja može se dodijeliti samo jedanput.

Član 6.

Grb Maglaja je stilizovana izvedba grba grada Maglaja, dimenzije 9x7 cm s plavom satenskom podlogom. Grb je četvrtastog oblika s motivima Gradine u gornjem dijelu i upisanom godinom 1408. U sredini se nalazi grafički prikaz tri rolne Natron papira, a u donjem dijelu naziv Maglaj.

Član 7.

Uz Grb Maglaja se dodjeljuje i prigodan poklon trajne vrijednosti u visini do 1.000,00 KM.

O vrsti poklona iz prethodnog stava ovog člana, odlučuje Općinski načelnik.

Član 8.

Počasnim građaninom Maglaja može se proglasiti osoba koja je dala naročit doprinos u afirmaciji vrijednosti demokratskog društva, historijskih događaja i tradicija bosanskohercegovačkih naroda, za razvijanje boljeg položaja i ugleda općine Maglaj, njenih odnosa s drugim lokalnim zajednicama u zemlji i inostranstvu te za razvoj općine Maglaj u cjelini ili pojedinih njenih dijelova, državnik ili dužnosnik druge države, član međunarodne organizacije, odnosno organizacije druge države ili njihovih tijela posebno zaslužan za općinu Maglaj i Bosnu i Hercegovinu u afirmaciji njihovih vrijednosti u skladu sa općeprihvaćenim načelima savremenog svijeta.

Priznanje Počasni građanin dodjeljuje se u obliku diplome.

Član 9.

Maglajska plaketa se dodjeljuje građanima ili grupi građana Maglaja, kao i drugim licima koji rade i djeluju na području općine Maglaj, udruženjima građana, privrednim društvima i privrednim subjektima za vidljiv doprinos u privrednom napretku općine Maglaj, ustanovama i drugim pravnim licima za njihov doprinos i postignute rezultate u radu, afirmaciji i zaštiti ljudskih prava i sloboda, tolerancije i demokratije, zaštite na radu i zaštite okoline, kao i za

doprinos u odbrani Maglaja i Bosne i Hercegovine, u spašavanju ljudi i imovine, unapređenju uslova života u Maglaju, afirmaciji i i razvoju lokalne samouprave, afirmaciji Maglaja u zemlji i inostranstvu, kao i unapređenju socijalne zaštite i dječije zaštite.

Član 10.

Maglajska plaketa dodjeljuje se u principu jednom u dvije (2) godine.

Jedna plaketa dodjeljuje se za doprinos u privrednom napretku općine.

Jedna plaketa dodjeljuje se za doprinos u razvoju civilnog društva.

Član 11.

Maglajska plaketa se dodjeljuje u vidu diplome sa otiskom grba Maglaja.

Član 12.

Maglajska lenta se dodjeljuje pojedincima koji su kroz svoj životni vijek svojim radom i djelovanjem ostavili vidljiv i prepoznatljiv trag i postali prepoznatljivi građani Maglaja.

Član 13.

Maglajska lenta dodjeljuje se svake dvije godine.

Maglajska lenta se dodjeljuje u obliku diplome i platnene satenske trake sa tekstom „Maglajska lenta za xxxx“.

Član 14.

Zahvalnica se dodjeljuje kao znak zahvalnosti i odavanja priznanja, u povodu jubileja fizičkih i pravnih lica, za konkretan uspjeh ili poduhvat ili doprinos u realizaciji projekta od javnog interesa.

Član 15.

Zahvalnica se dodjeljuje u obliku diplome.

Svake godine može se dodijeliti neograničen broj priznanja u vidu Zahvalnice.

II KRITERIJI ZA DODJELU JAVNIH PRIZNANJA

Član 16.

Kriteriji za dodjelu Grba Maglaja su:

- Najbolji rezultati postignuti u teorijskom i praktičnom radu na pojediniom područjima djelovanja (u oblasti nauke, privrede, prosvjete, kulture, umjetnosti, sporta, zdravstva, socijalne zaštite, zaštite okoline i drugim oblastima),
- Objavljena, prikazana, izložena, izvedena ili na drugi način prezentirana i nagrađena ostvarenja i rezultati,
- Izuzetan doprinos u odbrani Maglaja i Bosne i Hercegovine,
- Izuzetan doprinos i zalaganje i rad na očuvanju demokratije i zaštite osnovnih prava i sloboda čovjeka koja su proklamovana međunarodnim konvencijama, ustavom i zakonima,

- Izuzetan doprinos unapređenju života u Maglaju,
- Transparentan radi i javno istupanje u cilju afirmacije i promocije vrijednosti Maglaja i Bosne i Hercegovine,
- Javno objavljeni podaci ili rezultati za doprinos razvoju lokalne i šire zajednice, kao i javno objavljeni podaci ili izumimi čime se povećava produktivnost rada i ekonomičnost,
- Općepoznat ugled stručnjaka ili djelatnika iz određene oblasti, odnosno uspješnog privrednog društva, ustanove, udruženja građana i drugog pravnog subjekta,
- Javno objavljeni ili zvanično pribavljeni podaci o učešću u spašavanju ljudskih života i imovine.

Član 17.

Kriteriji za dodjelu Maglajske plakete su:

- Natprosječno ostvareni rezultati u radu pojedinačnog privrednika ili privrednog društva koje egzistira i djeluje u Maglaju,
- Vidljiv doprinos u privrednom napretku općine,
- Mjerljiv i vidljiv doprinos u zapošljavanju mladih i obrazovanih kadrova,
- Priznati radovi i rezultati u racionalizaciji i pronalascima,
- Mjerljiv doprinos u odbrani Maglaja i Bosne i Hercegovine.
- Naročit doprinos i javno zalaganje za razvoj demokratije, tolerancije, zaštite ljudskih prava i sloboda,
- Transparentan, javan i stalan rad i javno istupanje u cilju afirmacije i promocije maglajskih vrijednosti,
- Naročit doprinos u ostvarenju zaštite na radu i zaštite okoline,
- Općepoznati ugled stručnjaka ili aktiviste iz određenih oblasti (privrede, društvenih djelatnosti, udruženju građana i sl.),
- Naročit doprinos u radu humanitarnih organizacija (npr. višestruki davaoci krvi, poznati humanisti i sl.) i
- Mjerljiv doprinos u spašavanju ljudskih života i imovine.

Član 18.

Kriteriji za dodjelu Maglajske lente su:

- Javno objavljen ili općepoznat uspjeh ili doprinos građanina Maglaja za višegodišnji angažman u privrednom i društvenom životu Maglaja.

Član 19.

Kriteriji za dodjelu Zahvalnice su:

- Objavljeni i općepoznati lični ili kolektivni jubileji (godišnjice) građanina ili grupe građana iz Maglaja, kao i pravnih lica koja rade i djeluju na području općine Maglaj,
- Objavljeni ili općepoznati konkretan uspjeh ili poduhvat,
- Postignut uspjeh grupe građana i njihov doprinos u realizaciji konkretnog (manjeg) projekta od javnog interesa,
- Naročit doprinos u ostvarivanju zaštite na radu i zaštite okoline,
- Naročit doprinos u radu humanitarnih organizacija (npr. višestruki davalac krvi, poznati humanisti i sl.),
- Mjerljiv doprinos u spašavanju ljudskih života i imovine.

Član 20.

Javna priznanja dodjeljuju se povodom obilježavanja Dana općine Maglaj, 18. septembra.

Član 21.

Gradanima ili grupi građana javna priznanja mogu se dodjeljivati za života ili posthumno.

Istom fizičkom ili pravnom licu ili drugom subjektu, može se pojedino javno priznanje dodijeliti samo jedan puta.

Iz stava dva ovog člana, izuzimaju se priznanja Maglajska lenta i Zahvalnica.

Od navedenog u prethodnom stavu izuzeti su sljedeći slučajevi:

- Međunarodne organizacije i državljani drugih zemalja,
- Neposredno spašavanje ljudi i imovine,
- Druge jednokratne aktivnosti sa dugoročnim pozitivnim efektima na razvoj zajednice.

III POSTUPAK ZA DODJELJIVANJE JAVNIH PRIZNANJA

Član 22.

Općinsko vijeće Maglaj dodjeljuje javna priznanja iz člana 3. ove Odluke.

Član 23.

Pravo na podnošenje prijedloga za dodjelu javnih priznanja imaju, u skladu s ovom Odlukom, vijećnici i klubovi vijećnika, Općinski načelnik, organi mjesne samouprave, organi uprave na svim nivoima državne vlasti, ustanove, privredna društva, strukovne komore, vjerske zajednice, političke stranke, nevladine organizacije, neformalna grupa od najmanje 20 građana općine Maglaj i druge pravne osobe.

Samoinicijativa za dodjelu javnih priznanja, nije dopuštena.

Član 24.

Postupak dodjele javnih priznanja provodi Komisija za dodjelu javnih priznanja Općinskog vijeća Maglaj (u daljem tekstu: Komisija).

Član 25.

Komisija ima predsjednika i 4 člana, koje imenuje Općinsko vijeće Maglaj na period od četiri godine.

Komisijom predsjedava predsjedavajući Općinskog vijeća.

Članovi Komisije se biraju iz reda istaknutih, stručnih i javnih radnika iz različitih oblasti života i rada.

Član 26.

Komisija vrši sljedeće poslove:

- Donosi posvlovnik o radu,
- Obavještava javnost o načinu predlaganja i roku podnošenja prijave,

- Razmatra pristigle inicijative,
- Utvrđuje prijedloge za dodjelu javnih priznanja i
- Podnosi Općinskom vijeću izvještaj o svom radu.

Član 27.

Komisija pokreće redovnu proceduru za dodjelu javnih priznanja Maglaja u pravilu najkasnije do kraja mjeseca aprila tekuće godine raspisivanjem javnog konkursa i o tome obavještava javnost putem javnim glasilima dostupnih svim građanima općine Maglaj.

Obavještenje o raspisanom javnom konkursu, s tekstom konkursa, upućuje se, radi podnošenja prijedloga, relevantnim institucijama, privrednim društvima, udruženjima građana, strukovnim organizacijama i sl.

Član 28.

Konkurs za podnošenje prijedloga za dodjelu javnih priznanja traje 20 dana od dana objavljivanja.

Član 29.

Prijedlog za dodjelu javnog priznanja dostavlja se na unificiranom obrascu i dostavlja se Komisiji putem Službe Općinskog načelnika i Općinskog vijeća.

Prijedlog iz prethodnog stava sadrži sljedeće podatke:

- Ime, prezime i adresu kandidata, odnosno naziv privrednog društva, ustanove, vjerske zajednice, udruženja građana i drugih pravnih subjekata koji su predloženi za javno priznanje,
- Naziv priznanja za koji se kandidat predlaže,
- Obrazloženje prijedloga,
- Raspoloživu dokumentaciju kojom se potvrđuju navodi iz obrazloženja,
- Tačno naznačeno i opisano djelo, rad, uspjeh i sl. zbog kojih se predlaže.

Član 30.

Po isteku roka za podnošenje prijedloga za dodjelu javnih priznanja, Komisija utvrđuje prijedlog kandidata, a na temelju uvida u podnesene prijedloge i prateću dokumentaciju iz člana 26. ove Odluke vrši ocjenu formalne ispravnosti prijedloga sa aspekta pravne legitimacije podnosioca, sadržaja i roka podnošenja.

Komisija utvrđuje da li podneseni prijedlog ispunjava sve kriterije za predloženo priznanje te, ukoliko ne ispunjava, a ispunjava kriterije za drugo priznanje, prijedlog se može usmjeriti za eventualno dobijanje drugog priznanja iz člana 3. Odluke.

Prijedlozi koji budu podneseni od neovlaštenih podnosioca, izvan roka za podnošenje ili budu nepotpuni u pogledu sadržaja, neće se razmatrati.

Član 31.

Komisija radi u sjednicama o kojima se vodi zapisnik.

Komisija utvrđuje prijedlog odluke o dodjeli javnih priznanja po završenom vrednovanju i ocjenjivanju svih elemenata sadržanih u prijedlozima i priloženoj dokumentaciji.

Prijedlog odluke o dodjeli javnih priznanja se dostavlja Općinskom vijeću na razmatranje i usvajanje.

Prijedlozi za dodjelu javnih priznanja moraju imati pisano obrazloženje i sadržavati:

- Ime, prezime i adresu kandidata, odnosno naziv privrednog društva, ustanove, vjerske zajednice, udruženja građana i drugih pravnih subjekata koji su predloženi za javno priznanje,
- Naziv priznanja za koji se predlaže,
- Obrazloženje prijedloga,
- Raspoloživu dokumentaciju kojom se potvrđuju navodi iz obrazloženja,
- Tačno naznačeno i opisano djelo, rad, uspjeh i sl. zbog kojih se predlaže.

Općinsko vijeće može prijedlog odluke iz prethodnog stava usvojiti, izmijeniti ili odbiti.

Član 32.

Odluka o dodjeli priznanja će se objaviti u Službenim novinama općine Maglaj i sredstvima javnog informisanja.

Svi dobitnici javnih priznanja će biti javno afirmisani na prigodan način i nakon prijema javnog priznanja (objavljivanjem publikacija o dobitnicima putem televizijskih i radio emisija, objavljanjem članaka o dobitnicima i slično).

Član 33.

Evidencija o javnim priznanjima se vodi u Službi Općinskog načelnika i Općinskog vijeća.

Član 34.

Proglašenje i uručivanje javnih priznanja se vrši, u pravilu na svečanoj sjednici Općinskog vijeća povodom Dana općine Maglaj.

Javna priznanja uručuje predsjedavajući Općinskog vijeća, dopredsjedavajući Općinskog vijeća i Općinski načelnik.

Javno priznanje se uručuju dobitniku pojednicu, odnosno ovlaštenom predstavniku pravnog lica, a javno priznanje dodjeljeno posthumno, uručuju se članu porodice dobitnika.

Ako pojedinac, predstavnik pravnog lica ili član porodice iz prethodnog stava ovog člana ne može priznanje preuzeti na dan održavanja svečane sjednice ono se može uručiti i na drugi primjeren način.

IV OPOZIV PRIZNANJA

Član 35.

Priznanja iz ove Odluke mogu se opozvati.

Priznanje će se opozvati ako je nosilac priznanja pravosnažnom sudskom odlukom osuđen na bezuslovnu kaznu zatvora u trajanju dužem od 6 (šest) mjeseci, s izuzetkom krivičnih djela protiv sigurnosti javnog prometa.

Javno priznanje se može opozvati na prijedlog Komisije, odlukom Općinskog vijeća, u slučajevima kada dobitnik javnog priznanja svojim ponašanjem, djelovanjem, javnim istupom, govorom ili na neki drugi način narušava ugled javnog priznanja i općine Maglaj.

Član 36.

Opoziv javnog priznanja se vrši na način i po postupku za dodjelu javnog priznanja, izuzev radnji propisanih članom 24. i 25. ove Odluke.

Odluka o opozivu priznanja će se objaviti u Službenim novinama općine Maglaj i sredstvima javnog informisanja.



PREDSJEDAVAJUĆA

Syjetlana Zamboni